



FAKULTET ZA KRIMINALISTIKU,
KRIMINOLOGIJU I SIGURNOSNE STUDIJE



Mi, dole potpisani, predstavnici institucija neposredno ili posredno nadležnih za provedbu novog anti-korupcijskog zakonodavstva u Federaciji Bosne i Hercegovine, temeljem usvojenih zaključaka sa Okruglog stola na temu „*Novo anti-korupcijsko zakonodavstvo u Federaciji Bosne i Hercegovine-očekivanja, izazovi i solucije*“, održanog 7.10.2014. godine u Sarajevu u organizaciji Centra za istraživanje politike suprotstavljanja kriminalitetu (CPRC) i predstavništva Konrad Adenauer Fondacije u Bosni i Hercegovini, usaglašeni smo sa sljedećom

ZAJEDNIČKOM IZJAVOM

U pogledu očekivanja, izazova i solucija spram novog anti-korupcijskog zakonodavstva u Federaciji Bosne i Hercegovine

Svjesni složenosti problematike korupcije, organiziranog i privrednog kriminala, koji iziskuju najviši nivo ozbiljnosti u djelovanju zakonodavnih, izvršnih i pravosudnih instanci u Federaciji BiH,

Uvažavajući činjenicu da je politička volja na zakonodavnom i izvršnom nivou, odnosno volja nezavisnih tijela (VSTV i nezavisni odbori) značajan segment u provođenju usvojenih zakona,

Potvrđujući zajedničko zalaganje i interes za efikasnu implementaciju novog anti-korupcijskog zakonodavstva u Federaciji BiH,

Naglašavajući potrebu za uspostavljanjem međusobne saradnje u oblasti struke, obrazovanja i nauke,

Izražavajući visoku spremnost pokretanja specijaliziranog foruma koji bi služio kao platforma za kontinuiranu razmjenu znanja, iskustava i mišljenja praktičara, naučnika, te donosilaca odluka s ciljem sagledavanja stanja, te predlaganja mjera za uspješnu provedbu anti-korupcijskih zakona u Federaciji BiH,

U cilju efikasne primjene seta usvojenih anti-korupcijskih zakona u Federaciji Bosne i Hercegovine, potrebno je:

- Pravovremeno donijeti sve podzakonske akte u cilju sveobuhvatnog provođenja usvojenih zakonskih propisa;
- U Budžetu Federacije BiH obezbijediti potrebna finansijska sredstava za uspostavljanje i efikasno djelovanje novih institucija koje se osnivaju usvojenim anti-korupcijskim zakonima u Federaciji BiH (Posebni odjel Federalnog tužilaštva Federacije BiH, Posebni odjel Vrhovnog suda Federacije BiH i Federalna agencija za upravljanje oduzetom imovinom);
- Osigurati odabir potrebnih ljudskih resursa za rad u novo-uspostavljenim institucijama, sa najkvalitetnijim referencama u segmentu znanja i integriteta;
- Što prije omogućiti smještaj u adekvatan prostor, posebno sa aspekta funkcionalnosti i sigurnosti sudskih i tužilačkih organa;

- Stvoriti pretpostavke za adekvatnu zaštitu sigurnosti osoba, objekata i sredstava u novoosnovanim institucijama za borbu protiv korupcije i organiziranog kriminala u Federaciji BiH, uključujući adekvatnu krivično-pravnu zaštitu nosilaca pravosudnih funkcija, članova porodica nosilaca pravosudnih funkcija i njihove imovine, te svjedoka u pojedinačnim krivičnim postupcima;
- Osigurati ispunjenje svih uslova neophodnih za primjenu zakona u periodu *vacatio legis*, odnosno ukoliko se smatra da to realno neće biti moguće učiniti, potrebno je što hitnije preduzeti sve potrebne aktivnosti radi usvajanja potrebnih izmjena i dopuna zakona kojim bi se produžio period *vacatio legis*;
- Kontinuirano vršiti edukaciju i obuku ovlaštenih službenih osoba, nosilaca pravosudnih funkcija (sudaca i tužilaca), inspektora, pravobranilaca, istražitelja, službenika sudske policije i drugih profesionalaca u cilju efikasne primjene novog anti-korupcijskog zakonodavstva u Federaciji BiH;
- Osigurati potrebnu specijalizaciju i profesionalizaciju u institucijama koje se bave suzbijanjem korupcije i organiziranog kriminala;
- Pratiti provođenje propisa i pravovremeno otklanjati eventualne kolizije i nedostatke;
- Izvršiti analizu i kritički osvrt na ostale relevantne važeće propise te njihovo harmoniziranje sa novim zakonodavstvom;
- Pristupiti brzom rješavanju otvorenih problema u povezanim institucijama (inspekcija, policija, tužilaštva) na svim nivoima vlasti u Federaciji BiH;
- Raditi na što hitnijem donošenju propisa o uspostavljanju jedinstvenog katastra imovine u Federaciji BiH;
- Hitno pristupiti harmonizaciji propisa u oblasti zaštite svjedoka s posebnim osvrtom na procesnu i posebno vanprocesnu zaštitu i položaj „saradnika pravosuđa“;
- Optimizirati znanje i ekspertizu u svim agencijama za provedbu zakona i pravosudnim tijelima kroz procese edukacije na svim uključenim nivoima.

U Sarajevu, 25. XI. 2014. godine.